

四庫全書

集部

欽定四庫全書

蠹齋鉛刀編卷九

宋 周孚 撰

古律詩

寄湯朝美

君家堂下錦千堆老眼春風亦快哉勝日久孤三徑約
決辰深愧兩書來公租已辦應多暇家釀重開定幾回
會挽蜀狂成一醉莫嗔屐齒破蒼苔

史慶臣貧甚湯朝美士美以書招之作詩以餞

其行

憤時膽如斗論事須磔蝟閱人習熟中見子差吐氣十
年卧岷峨一芥視富貴只今五窮迫歎息一飽未子才
固崎嶇渠眼亦髣髴黃金賤鍾期此語可獻歎中山兩
公子好義吾所畏深憎涇渭雜屢斥蜩蟬沸尺書獨喚
子如子亦差慰相從一語合肯顧百金費孤松危欲死
莫惜加灌溉向來監河侯吾慙可勝諱

次韻陳丈陳丈宣城人歐公詩云共防梅老敵

難當

詩似梅翁不易當
公今後出更專場
自來不數王揚輩
平處猶參沈鮑行
梅柳作新還此際
江山增重信吾鄉
會須乞取飛霞佩
老藉猶能與頽顏

次韻蘇庭藻見寄庭藻所居號竹堂

忽忽別後已經年
堂下新篁又長鞭
何日來成漢陂集
只今空寄陝郊篇
封丘正自妨吾樂
畏壘誰能識子賢
俱坐先秦古書累
吾儕流落本非天

登多景樓分樓高天一握為韻得一字樓非舊
址惟東面可眺三隅暗甚時方改作榜稱米
元章書蓋偽也語寺僧當易之

往時百仞山丹樓麗朝日江天富佳致收攬不遺一忽
忽熙豐事電往那可詰故基誰為徙勝槩從此失如窺
一面網反墮三凌室幽懷鬱塵霧老眼暗髹漆雖云一
牛鳴每至輒悔出使君改築意正欲名稱實丁丁斤斧
功趁此玄月畢扁榜照華棖仍須此翁筆

步至石翁山送江亭下贈同游是山予意昔有
石姓居之今說怪甚

蜿蜒一徑踏蒼龍
赴此霜林葉未紅
翠壁嘘雲疑欲雨
滄江翻浪故多風
淒涼遺事從誰問
邂逅清遊與子同
會向詩翁覓新句
落霞孤鷺本非工

次韻史康時見贈

兩屨下峨岷
舊聞渠可人
相逢老史族
仍是少公親
濁酒能澆月
新詩不負春
旁觀還伎癢
吾亦捧心顰

次知府侍郎九日登送江亭韻

茲山聳孤秀正自愜公心
頻覺天能近都亡地可臨
煙江殊袞袞霜柳尚沉沉
但恨無陶謝芳醪只獨斟

寄辛幼安二首

我屋與君室濟河南北州
相逢楚天晚却看蜀江流
老境渾能迫妖氛竟未收
何時一塵地歸種故園秋
別去才三月人來已兩書
老懷多弛曠厚意獨勤渠
共歎飄流際能收謗罵餘
春風綠林壑還佇短轅車

次韻程道微三首

二年五經過子亦倦行役踵門覓一塵正爾不能得窮
愁侵兩鬢無酒灑胸臆見溺不解援我空三歎息

子家江濫觴還送江入海淒淒兕虎歎屈指已十載飢
唯三韭足寒止一衲在試問十二宮從來誰主宰

宿草被三徑呼兒不須鋤從來駟馬客肯顧蝸牛廬那
知傾蓋交向我情不踈惜無一端綺報子雙鯉魚

夜坐懷日新

小室頗修潔短牕亦虛明
讐書豈不佳念汝翻愴情憶
昨乾元初春風被簷楹
炙背俯晴軒鏗然讀書聲忽起
四方志遽作千里行
別來四寒暑歸計猶未成
買桂炊白玉崎嶇客都城
兩鬢不受愁應已白髮生
斗粟能幾何終年費經營
短鞭望馬腹我亦飢寒并
老懷少機械世路多溝坑
安得沮溺田與子窮歲耕

送杜丈仲微赴山陽倅

城外長淮綠渺瀰此行聊復雁門踦
邊烽已息何妨醉

民訟全希尚可詩昭代聲名方此振中年離別未須悲
潞陽老尉還天幸政自扳援得退之

亡友高伯庸滑稽玩世屢與人忤而見余則加
敬人共怪之亡八年矣今慶臣風度大略相
似而所忤所敬又極同也感歎之餘次慶臣
韻贈慶臣

鬱鬱東岡柏自青惜無大藥駐顏齡忽驚優孟重來楚
但怪蘇耽却姓丁千里自來須驥驥兩豪於子信螟蛉

隙駒歲月那容玩老語從今便當銘

陳使君生日二首

今時潁川守往日太丘翁已革因循弊兼收撫字功
民言方頌此天意曲酬公莫把彭錢比恐非斟酌同
控鯉雲煙外釣龍溪水邊遺蹤猶可見故老不虛傳
道豈容捐物功須解補天看渠落公後縱健只臞仙

讀劉丈元疇四傳戲題二首

使長河作酥酪真赤手攬象犀斯文誰解捉搦此老大

能滑稽

知音止老柳州如君亦奚斯流真復煩管城子端不數

下邳侯

華傳非退之
文因話錄言之

丙戌重五後一日予與同舟三人游虎丘庚寅

歲予亦以是日至楓橋望虎丘塔迫日莫歎
息而去

百丈寒崑塔孤蓬倦客船來迎十里外相識五年前天
迴方斜日林深忽暝烟平生戒三宿為汝復淒然

送鑒老住禾山二首

破壁荒垣誰解新渠儂方向阿師勤遙知豎拂拈椎處
不負青山起白雲

黃流渺渺獨浮杯俊鷗沖天亦快哉玉麈談玄他日事
不妨兼帶此山來

蠹齋鉛刀編卷九

欽定四庫全書

蠹齋鉛刀編卷十

宋 周孚 撰

古律詩

獨遊因勝有懷蘇丈信臣時任衡州幕予明年
亦官淮上矣

力田不罪歲吾猶識斯人氣清色坦夷可畏還可親五
年鹿門遊莫辨主與賓老屋每下榻寒庖屢分珍人生
會合難朝吳莫燕秦忽隨湖雁去坐見江梅春滄波與

天連音問何由頻向來燕居室蕭然淡無塵簿書換清
談歎息生一貧新陽革故歲我復效此顰吾人亦何事
政愧祁孔賓何時此山南得與翁並鄰

寄仲微杜丈

小雨催春杏半紅轉頭庭戶已秋風劉楨昔病雖差愈
侯喜今詩竟未工瘦馬羸僮還自笑綠尊黃菊定誰同
十年塞耳人間語剩欲從公一破聾

題后山集後次可正平韻

嶷嶷陳夫子高名天壤間讀書能妙斷行已有深閑句

法窺唐杜文章規漢班九原埋玉樹遺簡仰高山

可正平詩

甚美元非惡嗟公墮此間真為四君次可厭七年閑汴

泗空千載晁

叔用

何

斯峯

僅一班淒涼大陽履埋沒若河山

哭員著作

每憎雞盡穀自許鳳鳴岡論事方劉向修文遽卜商高
名寧泯沒老意自淒涼歎息褚中惠此生那可忘

登普照山有懷宛陵陳丈侍郎二首

登臨才昨日時序亦忽忽敗幕無巢燕寒空有斷鴻老
懷空對月病骨不禁風遠水澄寒練令人憶謝公

遙聞宛陵老猶寄梵王宮穫稻雖終畝誅茆未畢工斯
文元有托吾道豈終窮莫作居東想君王識鄭崇

鄧才卿同年兩顧敝廬病睡不克見別後次庭
藻送行韻謝之

富貴移人或望塵獨於衰病却情親瀾翻未聽渠僮語
骯髒懸知我輩人正續黃梁今日夢敢尋紫陌向時春

三年兩踏蓬蒿徑此客他時不是新

送劉元時解官歸宣城兼問訊侍郎陳丈

羣書諷誦不離口君才豈止王季友力探千載自青眼
智効一官今白首三年拄頰京江上車如雞栖馬如狗
旁人竊歎君則笑一闕從來有奇偶椎鼓發船忽復去
聚散忽忽一翻手涇川綠漲三百里試脫征衣濯塵垢
人間至計只樗櫟身外虛名本箕斗君歸更問且過翁
富貴何如一杯酒

寄史伯強

一日抵三歲子行踰十旬昔如宮應商今若參與辰力
挽殊未來歎息寒江濱附書雙鯉魚滄波正瀟淪平生
金石交如子不數人飽更松桂秋不羨桃李春向來相
期處可但髯絕倫一朝忽去眼那能不酸辛悠悠世網
中雙鬢各已新豈無耦耕約奈此離別頻富貴朝露耳
莫負頭上巾歸來建德國與子同問津

戲題小庵畫軸三首

扁舟渺渺入平湖秋葉經霜半已無不是幽林欠殘雪

為君題作剡溪圖

寒林平遠

一落縈維中永別嘯雲友秋月耿寒林時來夢中否

後

當時餓鴟箭驚皇無復魂困卧階下草深愧主人恩

廣

次韻侯彥康

簞瓢從古亦山雌歎息渠儂定可師挽士真難九牛尾
酬君誰可五羊皮過逢政自艱難際感慨俱非少壯時
樽散鄭虔官益冷得錢沽酒不須疑

朱毅夫挽詞

賣藥長安市退藏三十秋
來從阿戎語始與德公遊
一別俄黃壤遙憐尚黑頭
心知漆燈在應為此翁留

送辛幼安

西風掠面不勝塵老欲從君自濯薰
兩意未成還忤俗一飢相迫又離羣
只今參佐須孫楚何日公卿屬范雲
節物關心那可別斷紅疎綠正春分

次韻彥康

讀書策新功子久勗此課蒲梢簫寒雲了不見坎軻深
懷浹背恥但欲袖手坐新詩忽來辱快讀起疲憊還疑
正始在欲突黃初過斯文未易到吾黨真可賀向來豫
章法政復如此作鈕頭三寸澤子質況黃稭只今百尺
的已見一矢破更期十載後凜凜誰子奈耆年日凋喪
我亦老寒餓奇窮不自惜乃復珍此貨但恐黃禾空子
駒誰秣莖

贈頃昂伯高兼簡王丈公瑞頃嘗識先君

淒涼元祐幾遺民邂逅京江兩病身
阮籍莫年唯可醉揚雄平日固當貧
久知丘壑須吾黨晚喜簞瓢有若人
同識嵇公更誰在仲任雖健鬢如銀

寄辛滌州

江皋追送僅踰旬節物俄驚一度新
西澗潮生還值雨南山雪盡正逢春
遙知風韻如前輩可有篇章憶故人
擬向瑯琊問幽事兩翁遺迹未埃塵

次韻庭藻留王用賓韻別趙楚才

落魄山陽市悲歌獨子聽
相過常出日小住亦翻星
此際心還折何方鬢解青
一杯寒食酒相與記沉冥

離山陽戲次庭藻韻簡叔異二首

忽忽掠面只黃沙行盡孤城不見花
政是江南好時節暖風吹柳欲藏鴉

去日寒亭尚有梅歸來已過海棠開
叩門剥啄家人笑驚怪安西老友回

寄朝美

君才秀吾鄉真可歌大雅疏通信而靜少有似君者十
年卧墻東櫟棘笑梧櫟摩挲懷中璧顧我知者寡一朝
簡雲去始駭天下馬寧如不祥金未鑄先躍冶煌煌漢
家業條畫待董賈皇文閱石室秘署向金馬飛騰吾敢
羨拙藝真毀瓦出處判殊塗歸耕弋陽野

贈王南仲

妙語富停蓄高標邈巉巖半面逆旅中知子固不凡語
離今幾時歲月如驚帆南譙再相遇黃塵撲征衫握手

互歎息白髮不可芟吾儕與世踈觸事俱殽函飢鷹久
已疲狡兔方自斃二頃可以休此意神所監縱復落癡
鈍猶應免貪饒一語子可思病馬愁轡銜寄語同社人
吾將老寒畠

憲齋鉛刀編卷十

欽定四庫全書

蠹齋鉛刀編卷十一

宋 周孚 撰

古律詩

道士劉先覺之金陵

挽袂小徘徊秋風菊正開方驚鷗可狎忽與雁同回老
幹元如腊衰懷久已灰丹砂未得訣佇子寄方來

次韻答李清宇姜德光

忽忽一席地勞子數追尋厚意嗟虛辱衰年愧不任高

懷元淡薄妙語不崎嶇老檜千尋直寒泉百尺深世方
憎落落吾自畏駸駸生計貧非病羈窮古亦今未須悲
齟齬直可付呻吟誰復明茲事深思詰此心空垂老任
釣莫辨伯牙琴試采南山蕨同君潔釜鬻

次韻奉答楊判官繼甫

向君官昇今復淪十年兩地無此儒喧啾蹇吃方一區
君自鵠白渠自烏士安門人有摯虞斯文灰冷今復蘇
胷次與古真合符鄙夫瀟落世所無逃禪政自縈瓠壺

豈有筆力凌三都老僉人方笑玄謨愧君清坐客歌呼
君才如魯我則邾氣味莫間沂與洙甲辰雖俱那得如
蒼髯直幹霜不枯歸來破屋從繩樞飛騰付君吾敢詆

謝端硯辛滁州幼安

君家即墨君不與世同調紫雲覆寒冰色與質俱妙誰
知窮荒地尤物來越徼探囊忽見畀此事出吾料隋珠
暗投處歎息真可弔物生各有用瑚璉薦清廟君才兩
漢餘妙句出長嘯吾衰亦粗爾老語世不要摩挲冰玉

質自慶還自譙願君為追琢勿令研空笑

次韻史伯強

金陵望京江與子俱異鄉以膠投漆中非子吾誰望平
生山林願兒乳寧可斷招子獨不來同誰弋鳬雁乖離
念存沒一飯再三歇往者十年夢在者千里別寄聲問
平安此去何時還熾火暖濁酒此盟安可寒

趙漕生日

思丁酉

治世才難得公生瑞聖朝高懷元稹契異骨更松喬驥

駮須千里鷄雛合九霄明年東府宴相與記今朝
名族仍前輩高才更望郎經年滯龍節數日冠鷄行白
鶴開新厯青黏屏舊方春風柳條綠傳賜看勾芒

金山海書記寄七騎

兩騎並驅爭欲前兩騎舍矢俱應弦一騎揮撾一負箭
一騎力挽弓初圓寒風瀟瀟沙漠漠封豕可擒熊可搏
漢家飛將未出關政使渠儂專此樂君不見往年胡虜
寫此圖宛陵詩翁最愛渠戲將醉墨作長句歲月政當

嘉祐初故家文物今星散老筆憑誰辯真贗健兒走馬
大梁城對君此畫空三歎

次韻贛州知府陳侍郎二首前篇寄幼安後篇
寄季陵

乘輅西去定何人驚倒吳儂政要君平日比肩空絳灌
此行知已有華勛不令殘孽終煩國信是高才可冠軍
鋒蝟斧蟾當著語病夫今歲懶於文

朝班數日待歸來又醉凌虛百尺臺兩歲雖為汝曹福

一州那盡此翁才只今音問踰千里何日登臨共一盃
宣室受釐知已久問公藏縮獨何哉

高郵知軍覓芍藥一枝五花三絕

芒種逢花已自難瑞雲攢處凭欄干煩君問取同州例
一幹三花奏牡丹

蜀錦團圞照眼明游蜂乍見亦須驚君知此種來何處
花萼樓中五弟兄

涇川游女漢宮妃壓倒渠儂金帶圍吾府只今虛席在

棧羊醜酒送公歸

五月同州奏牡丹一枝三花夏文莊公集云今歲四月二十一日芒種金

帶圍芍藥名事
見後山談叢

寄辛幼安

飛鷺跼跼瘴煙中
歎息渠儂伎已窮
歌壑老松真耐久
燎原荒草易成空
危機可畏渾如此
莊語能聽只有公
已識柴車勝朱轂
快來相就北窗風

送陳唐卿尉繁昌二首

一負那可忍子亦老夫如
晚歲難忘祿生平誤信書相

蓬搔首處共是折腰初莫作高常侍狂歌憶孟諸
老筆倦場屋今年方自如無為墮丹墨可使廢詩書妙
質嗟誰似修塗記此初摩挲和氏璧吾語亦聖諸

題彭氏韋經堂

華堂語熟更琵琶渠向人前亦自誇
渠几明牕那可負
喜君能記魯東家

公圭侯印照鄉閭到了扶陽只漢儒
不向師門論官閥
未知回賜可無殊

天寧寺清宇壁間韻

風歷寒牕竹自鳴
老談還得片時醒
挽君小住君知否
恐有楞伽未了經

與王南仲李清宇夜坐十二月八日大雨

急景不可駐
十年無好懷
飄流還此日
團聚且吾儕
短
日
衣
衫
盡
寒
雲
雨
雪
偕
昏
燈
照
清
夜
安
得
酒
如
淮

喜清宇伯強自外縣歸

不見尊前兩友生
流年欲盡不勝情
寒牕孤坐風初定

短策同來雪正晴
濁酒只今俱入務
新詩從此試尋盟
黃塵掠面無佳思
乞得逢君眼便明

題滌倅燕丈文伯蘧廬

浮雲過眼只斯須
兀兀粘牆政笑渠
萬事悟來俱蟻穴
一官隨處是蘧廬
已知要路真聊爾
試問高懷竟孰如
老樹扶疎真可愛
因君又欲感歸歟

以黃公金華伯五字為韻上黃仲秉侍郎

求道固多岐
我馬玄以黃
耳聞老叔度
欲聚三月糧
今

日復何幸得上君子堂醫門不拒疾請試囊中方

先朝盛文物最盛元祐中我生百年後深思附冥鴻人
欲天不違今復識此翁何以知其然風味如長公

古貨不易售八荒孰知音零落子雲書塵埃伯牙琴我
慙久病此屬公聽呻吟可笑朱汗漫屠龍費千金

硬語幹地軸奇辭拔鯨牙向來豫章公一洗空百家此
燈不可傳公實優墨華銀河會可窮從公丐靈槎

名如九鼎重筆有萬鈞力甘從潁川最厭就承明直頌

時未承顏既見有矜色歸語同舍生吾幾類河伯

贈楊文伯

忽忽永陽城別我正月尾當時已念子山路石磊砢只
今再相見霜風凋百卉長年走道路煖席能得幾信知
書作祟可但窮有鬼殫精謾屠龍適周終履絺歎危不
少懾歎息子亦偉倒囊欲振子吾事真不避西州老次
公採掇到葑菲肯令霜雪幹凋喪雜蒲葦子才正牢落
我意空憤悱勉旃無多談寒醅綠如蟻

送杜仲微知容州

丁年不負短檠燈中歲危塗屢折肱自古詩人固屯蹇
喜公今日少騫騰遙知去路方收秣預約來書定鑿冰
勾漏丹砂能寄否據床扶病髮鬢髥

問杜叔異覓藤州簾

舊識藤州簾清寒愜病夫深宜薦黃妳真可配青奴絕
境無由致衰年政此須漫膚仍復汗君記法曹無

蠹齋鉛刀編卷十一

欽定四庫全書

蠹齋鉛刀編卷十二

宋 周孚 撰

古律詩

呈曾秀州原伯二首

歎息茶山老知名四十年驚看二龍在喜有一燈傳厚
禮慙虛左微材許詣前形神見公妙閉口敢言禪

古人不可見此恨與生俱平日輕餘子今年識大巫迷
塗方此困羸瘵待公蘇換骨寧無法聊煩舉一隅

次前韻答原伯二首

食蓼不知厭雕籤踰十年唯斬一語契不必萬人傳凜凜元劉上駸駸晉魏前頊煩三昧手為變小乘禪

涪翁所傳法皎與日星俱舉世淪燕說看公走鄭巫至音常想像臆腹謾模蘇安得空桑曲相從奏坐隅

寄宛陵陳丈

莫雲低處是江東病眼淒迷夕照紅千里相望空咄咄一書欲寄竟忽忽已休心跡囂塵外更付功名筆研中

遙想家居老彭澤晚年身世只僧同

次韻印老別峯壁間枯木二首

與世爭春念已忘道人還許寄齋房
草間翁仲真知己試問曾經幾度霜

耒陽祠宇渺天涯幻事何須置齒牙
肯伴石翁林下客優曇當有寄生花

再次韻前篇屬印禪師後篇屬選上人二首

老禪真與世相忘十載驚濤濺石房
指似貞心人不解

斷槎素壁白如霜

阿師曾入丹淵室買馬今年得鋸牙樹倒藤枯渠解寫
老夫真欲笑桃花

次韻趙從之喜雨

條看半額莫雲張無復燒空更夕陽螟蟥初逢辟邪玉
畦塍真有反生香遙知潤澤還應漲便覺炎風也自涼
回互凶豐一翻手君看造物信難量

送黃侍郎仲秉赴瀘南

召杜久不作公來甫暮年吾民亦何負今公返三川王
命不可稽無由挽公船纍纍嬰兒啼政後來道邊驚鴻
未安集歎息渠可憐公才岷峨秀風度晉魏前宜方次
公駕可拍叔度肩茲行去中都江月六上弦雖云諸侯
師我意終歛然孝友當處中此翁那成邊落日照歸旌
春江動離筵餞公野王筇老淚如迸泉

次韻寄士美

長夏苦不佳湯熨方少休床頭得新詩恍若從子游絢

爛晚花秀紫紆莫江流寒蟬久聒耳見此長鳴鷗吾友
蘇季子莫年專一丘相從寄琢磨喜子今得儔隋珠荆
文璧子餽渠則酬寄聲問平安憶此衰病不親交半九
泉老境集百憂能來叙離闊過是吾何求

再次韻贈從之并寄朝美士美

大湯陳元方小湯許丈休向來京江岸政作汝潁游一
隨簡書去寒江自湍流我瞻天際鴻渠歎波上鷗之子
雖近交襟懷亦林丘緬惟兩玉人非子孰可儔高標互

暉映妙語相應酬鼎立照茅茨何日能此不句曲向荆
溪遷徙非所憂得客三士間衰年更何求

聽環上人琴

幽絃窈眇方秋蠅和音條鬯俄春鶯斷冰哀玉俱入耳
聽盡清商聽清徵浮雲斂盡江月明不意莫耳聞此聲
夷中知白骨已朽後來如師亦希有但憂曲古世罕聽
那不少徇時人情寧甘絃斷挂壁角經聲鹿鳴渠不學

送俞君任

中歲厭乖隔此行幾挽裾故交還去子老境孰知予雪
屋傳觴處春波解纜初相過每倉卒欲留重跼躄身健
宜加飯官閒剩著書它年赤車召留眼看相如

次從之韻招從之

學子今方竹葦如自憐老腹獨空虛短畦小摘猶能飯
荒徑徐行可當車世事從來多鹵莽吾儕何自有贏餘
肯來蠹簡同籤整却恐令君得異書

許叔庸生日

酌公以京江潏潏之酒壽公以海蕃氤氲之香南山威
鳳下煙霧北嶽老松凌雪霜十年陰功不勝紀僵仆為
蘇痿為起沉復旌陽嫡孫子火棗交梨固應爾公袞元
圭侍丹宸不待渠儂菊潭水千二百歲從今始

寄陳道人時在呂城竇氏莊

渠家五桂後卜宅近青郊老竹窗前幹寒松屋外梢才
拋汗脚襪真得蓋頭茅落日春山路病夫還解包

有懷陳杜二丈二首

容南老守幾時回更拚重看江上梅便熱藤筍猶可漆
未寒筒布會須裁

寄語金陵漢郡丞與誰同醉復同醒不須弔古烏衣巷
且復尋春白下亭

寄幼安

送君城西原春水今鑿冰兩州灌瓜地一往竟未能衡
門閉青苔欲語誰復應招邀西飛鴻因得問寢興向時
金華翁與君嘗伏膺清談尚尊俎高標忽丘陵梁木果

爾推天理安可憑吾儕鬼擲揄可但世所憎霜風拉枯
桑囑君護茵馮我病比復加日飯那得升殘年卧閭巷
盛事望友朋得見君奮飛吾甘老薪蒸

次韻寄從之時聞游善權寺

曲檻臨煙雨書來政獨憑斷崖青自獻森樹綠相仍勝
踐吾方夢長閒子未應聊煩相佳處衰老欲依僧

贈侯元英予病療之而愈

此生毛髮燎洪鑪二豎駸駸更擣虛惡劇方渠甚炮炙

殘年非子已丘墟較量絕藝真神似驚怪羸骸却壯如
莫道何顓百無著識君嘗自十年初

題所畫梅竹二首

東坡戲作有聲畫歎息何人為賞音雨葉煙梢出新意
老夫知子用功深

駸駸老境困埃塵開卷霜林解笑人畫地饒涎君莫怪
十年魂斷故園春

次韻朱子代蕪懷君任教授年兄二首

吳門南望水漫漫擬欲高飛欠羽翰
老境思渠甚飢渴尺書煩子問平安
自知譜牒俱冰氏敢厭班資但虱官
它日相逢吾有約秋霜侵鬢折腰難


粲粲新詩墮我前夜深霜月照瓊田
共驚敗榻才三語大勝塵編更十年
伏櫪世誰憐老驥浮空君自笑飢鷲
一窮似我那須怪解困吾曹始是天

別鄉舊

乙未五月

耕田畏秋旱我老將奈何清晨一葉舟
凌此萬頃波此

豈我欲然食口如鴈鶩逢迎非本心慙負生積疴君看
紫桑翁當時亦絃歌人前強磨洗謂與渠同科悠悠天
壤間何向非南柯餐錢苟有贏吾願初無多歸從五犢
牛自種千把禾不學陶士衡衰年更婆娑



蠹齋鉛刀編卷十二

欽定四庫全書

集部

蠹齋鉛刀編卷十三至九

詳校官庶吉士臣吳烜

主事_臣呂雲棟覆勘

總校官進士臣繆琪

校對官中書臣李斯咏

謄錄監生臣劉清澗

欽定四庫全書

蠹齋鉛刀編卷十三

宋 周孚 撰

古律詩

寄從之時聞黃丈仲秉初亡

甲午

隴月撩人特地圓
真成千里共嬋娟
尺書好附今年雁
別酒嘗聽去夏蟬
二頃未知何處是
九原誰似此翁賢
老懷欲語還惆悵
腸斷春江上水船

次韻題南仲詩卷兼東廷珍

乙未

新詩可但老夫降窺杜真能見牖牕靜夜飛泉鳴遠壑
莫秋孤月印晴江絃從渠去雖難續鼎自君來信可扛
銀燭高張那得爾且揩眵眼伴殘缸

次韻鶴林伸書記

不須沽酒別陶潛修竹陰陰翠滿簾拂拭面前塵土案
與君相對課楞嚴

日者吳九萬精三命又精於相三命則吾不知
骨相不媚則吾自知之

官槐廣文舍愧子獨來頻老境寧高位衰年只病身平生長孺慙半世子雲貧照影吾猶笑如渠豈貴人

贈胡應誠

歌傾老屋寄江濱曾見官居四過春兩屐崎嶇那憚遠一尊倉卒不言貧舊游到此俱塵迹異縣惟君是故人
偏仄老懷無與語更炊香稻住逡巡

招陳生飯

別甌炊香飯吾方望子來難從瘦筇覓試著小詩催老

語元誰聽幽懷始此開
虛庭佇明月相與少徘徊

次陳生韻

子肯來從我塵沙兩鬢黃
飢鷹那擇肉老雁尚隨陽
蠹簡真堪怨寒醅未易忘
嚶嚶浴沂老吾敢笑渠狂

寄何髯

髯何不見二年餘
落魄京塵強健無
淮上風沙尤可厭
今年我亦白髭鬚

哭彥康次德裕韻

力學世不售甘心委埃塵悠悠長夜臺一往不願晨雖
過賈誼年竟似黔婁貧施施者誰子佩玉拖朝紳交游
能幾何又復失此人妙語不可繼老懷向誰親憶昔共
艱阨我軀猶子身石穀忽爾摧此去良苦辛豈無堂堂
交政恐難與仁載歌黃鳥詩老淚淋衣巾

汪倅生日二首

寄語溪頭赤鯁公只今為計莫匆匆直須整頓乾坤了
却駕颺輪迓此翁

大兒文采漢於菟叔季駸駸汗血駒當有傳家如此少
請公但醉碧琳腴

金山十詠呈坦叔

奎文閣

煌煌百寶函珠璧爛星月驚倒西域胡祥光與天接

妙高臺

江雲隱簷楹海月淨窓几安得德雲來與渠同徙倚

付衣堂

大地不解容四衆俱欲殺不辨如是心定難消此衲

玉鑑堂

微風不動波瑩可照毛髮誰解與渠磨寒空秋夜月

頭陀品

餘妖屏蛇虺老屋化金碧惜無柳柳州為銘品下石

雄跨堂

一辱雲漢章林壑遂增價便是補陀峯還須避三舍

楞伽室

不見碧眼胡忽忽心未穩印心須此經煩君刺傳本

吞海亭

誰云滄溟深一吸了無在試問何樣人身如椰子大

浸月亭

寥寥清夜月現此亭中水誰能同斯游歸喚寒山子

卷雪亭

方驚匹練橫忽駭羣羊散縱使踣蒼崖老禪唯解看

趙漕再可生日

不待丹砂入頰紅
長生元復自陰功
但令仁與甘棠似
甲子三周會見公

萬頃春江一葦杭
追鋒歸去覲明光
明年此夜端門宴
應向紅雲侍玉皇

一杯請壽碧琳腴
倦客駸駸欲白須
會見廟堂登聖相
自甘山澤著臞儒

送周譽卿尉通城

別君所畦槐忽已
蔭簷瓦三年望歸船
老屋勤掃洒只

今十日欸信是天所假朝粳語已瘳夜燭醉還炮兒童
互窺覘有客如此寡觀君豈癯仙鬢蒼面如赭不應酸
寒債亦復似東野忽忽從此去孰是知音者折腰易斗
粟吾輩計亦下我場無良苗何由繫君馬

何山人欲為僧

來償綺語債各已鬢星星宿債吾方困迷塗子遽醒真
為鏡空老不負佛名經一紙龍鍾語憐君獨肯聽

書日新煙江秋晚圖後

莫年何處是菟裘
逆帽黃塵子更愁
開卷只今先有識
晚煙寒葦兩沙鷗

題宣書記塞門積雪圖
此圖真柳子厚所謂千
山鳥飛絕萬人行蹤滅
者若孤舟蓑笠翁獨釣
寒江雪則以余詩見之

冰崖雪嶺鬬巉嵒
中有新詩子試參
短笠輕蓑釣寒瀨
為君題出是江南

趙從之詩來次韻寄之

論高不遽蔭語妙無摘裂堂堂正始流渠可補此缺斯
文久不見老意今始愜摩挲斲輪具兩手付已決吾聞
古志士立操凜冰雪方其自樹立政復誰識別書成付
後世豈為兒輩設浮雲雖掩鬱孤月終皎潔此言如苦
茶乞子甘齒頰

送李清宇因寄滁陽舊游

君行還過永陽郡忽憶老夫嘗賦詩庶子泉頭納涼處
醉翁亭上送秋時春來猿鳥應思我別後林泉定付誰

為語東風木芍藥暮年衰鬢不相宜

蠹齋鉛刀編卷十三

欽定四庫全書

蠹齋鉛刀編卷十四

宋 周孚 撰

古律詩

贈相者

卧沙老木强雕鏤正自旁人替子羞縱使今年果騰踏
也應笑倒鄧元侯

次韻張元功見貽

山林未成歸須鬢各已老下田我方耘薄俸子始飽緬

懷千里駕荒徑宿秋草誰知剥啄聲真來慰懷抱崎嶇
得一笑支柱費百巧羈窮了如舊但覺詩愈好青山艷
桃李淥水漾芹藻惟時夏正中觸熱畏長道子車且休
息我屋當洒掃覲面尚未旬語離無乃早槐陰可綴觴
共子一傾倒但恐老伯松羞觀太玄草

寄陳德厚

壬午

駸駸邊馬驕漠漠楚氛惡妖區未灰釘劇陣猛刺所向
來百金軀垂老付溝壑頭涔何必療心悸還自愕平生

陳孺子夙佩千金諾
渠如早奮飛艱歲終有託
那知亦踳蹬正復同
索寞汙池雜蛟蜃叢艾紛
燕雀窮檐倚楹歎搏擊望
一鶚祝君魯曹子玉陞奏
方略銘功燦燕石畫像雄
漢閣平時萬戶賞端不羞
衛霍屠羊反故肆吾分本
藜藿

書王偉詩卷六言二首

玩世子方窮巷懷人渠已荒
丘文舉舊陪何尹退之今
信宣州

政自磊磊落落不須草草忽忽嘗興懷後山老肯著眼
豫章公

夢與辛幼安遇於一精舍予賦詩一篇覺而記
其卒章云它年寄書處當記盧仝窮因賦此
詩寄之

秋霜草花落夢君浮屠宮驕魂得清游短章見深衷破
屋仰見天何人記盧仝相逢大槐國一笑仍忽忽與君
十年交九年悲轉蓬君行牛斗南我在淮漢東修途繚

山岳此會何緣同
伏枕自歎息
衰懷托西風
啾啾籬間
雀冉冉天際
鴻擔簦亦何憾
吾生自當窮
扁舟具蓑笠
久已藏胷中
它年君來時
葦間尋此翁

代人作孫尚書挽詞二首

耆德今無幾
公誰敢比肩
甘泉方舊藉
京兆遽新阡
清議今何負
遺書竟莫傳
單杯無自奠
老淚倍潸然

平生玩鷗老
韓孟復相逢
暮齒俱三虎
中途止一龍
公
令還此逝
吾老欲誰從
它日延陵劍
猶堪挂墓松

公素與汪

公翰林齊名復俱以謫去朝而汪公役十
五年矣玩鷗汪公零陵時所居亭名也

寄趙從之

皖公城外佳山水經歲登臨亦快哉未省曾逢玉蟾否
已應親弔石牛來洗空俗垢吾方羨收盡詩材子始回
紫筍舊芽應好在午窓春斲正如雷

題薛希誼傲窓

平生湖海老元龍何事低徊向此中恥把曠懷陪聚蟻
力將幽趣付冥鴻甌當墮處真堪笑雖到無時未服窮

他日徵來豹林谷尚應叉手對諸公

次韻杜正南訥長老

鼎鼎百年才一炊人生何處是真依
百方莫放癡蠅出一語還驚俊鶻飛
喜子解圓今日話看誰能湊此翁機
不須更說衡山事只得渠家半芋歸

冬夜懷陳丈侍郎

寒繒配新編得公章貢信日日望公歸
枯株借餘潤公令向何所寂寞返鄉郡
風江困泊雨嶺倦登頓瘳膏

運方穿自古同此恨吾儕互驚惋公意誰喜愠新醅醇
易醉晚稻香可飯已無越吟悲那有楚騷怨平生白鷗
盟天與諧夙願玉音久不嗣故歲行欲盡空齋撥殘灰
哀鴻有餘韻繫書元浪語安否倩誰問寒燭識此懷詩
成泣餘寸

答陳渙見贈

好學有如此肯來從我游間名知未謝老面不勝羞政
復勤三上行當讓一頭寒魚在沮洳縱有不須求

聞辛幼安移漕京西

孤鴻茫茫暮天闊
問君章貢何時發
去年不得一字書
今日又看千里月
向來人物推此邦
至人不死惟老龐
請君剩釀蒲萄酒
為君酹渠須百缸

送印禪師赴雪竇二首

拍板門槌且罷休
又將竿木向何州
瘦藤去處君知否
袖有黃巢折劍頭

師子峯高壓白雲
當時此老最尖新
百年舊事誰昭洗

今日南來又蜀人

送向漕端叔二首

此絕筆詩也病中作

斷雲踈處雨瀟瀟
強挽歸舟候晚潮
除却王生貧病客
更誰解識蓋寬饒

紛紛寵辱不須驚
且把遺編較兩程
不負虎丘山下語
此翁真是老書生

蠹齋鉛刀編卷十四

欽定四庫全書

蠹齋鉛刀編卷十五

宋 周孚 撰

表牋

天申節表

代知州

千載一時幸遇生商之旦九州四海俱有祝堯之心得
與羣黎同稱萬壽恭惟神功默運至道無為玩心赤水
之珠靜惟神合忘味金莖之露算與天同惟誕節之載
臨宜龐休之翕受臣拘縻外服夢寐中宸遐企漢儀莫

獲趨於東閣載歌周雅願有過於南山

天申節表代運使

鬱鬱葱葱適生商之令旦皇皇穆穆講壽漢之上儀協
氣橫流頌聲載起恭惟儲精蠶獲探賾胚渾道妙環中
不待崆峒之問神凝物表自有華胥之游載臨震夙之
辰倍集綿洪之祉臣偶持符節莫造闕廷俛惟拱極之
誠不忘夙夜仰祝同天之算少効涓埃

會慶節表代知州

千載一時適契流虹之旦羣黎百姓俱懷望日之心顧
茲守土之微敢後祝釐之請恭惟甚盛之德配乎祖宗
不殺之仁周於夷夏用大鈞而播物執左契以臨民載
臨震夙之期實有綿洪之慶酌衢尊於萬國咸戴皇恩
握金鑑於千秋難窮睿算臣幸逢華旦阻在外藩孤跡
零丁莫厠鳬趨之列禁闈綿邈第懷輦抃之勤

會慶節表

代運使

真人應世闡流虹飛電之祥率土傾心起就日望雲之

想願擬華封之祝歡騰嵩岳之呼恭惟皇帝陛下天縱
聰明心傳精一體孫謀而御極積厚德以重光宜嗣歷
之無疆獲降年之有永臣叨分符竹遠企冕旒奉都護
之觴神每馳於北闕歌周臣之雅壽仰贊於南山

賀皇太子表

以新陽之令辰展大慶之殊禮自中及外式舞且歌恭
惟皇太子殿下德性粹沖天資淵懿承祧主鬯共仰文
孫之仁視膳問安輔成聖父之孝殊休格於千載喜色

形於兩宮豈止宮闈之歡實曰宗社之福某限以在外
不獲趨詣廷陛稱賀

賀太上皇后表

歲元肇易壽典備成歡愉見於兩宮祝頌周於四表太
上皇后殿下德惟坤媿明與日符虞帝期頤正資瀉汭
之助文王壽考實惟太妣之同共膺岡陵之休坐享雲
來之慶臣以符節在外不獲躬詣闕廷

賀赦書表

慶典備成鴻恩誕布歡聲浹於四海和氣周於兩儀恭
惟聰明文思剛健純粹履千載非常之運成百王莫備
之功傳繼有歸如唐堯之禪舜溫清不倦真武王之事
文茂膺有永之祥大需惟新之澤歸尊於父降休自天
臣偶以薄材得官外服遙瞻天闕身莫與於走趨寅奉
德音心第懷於踰舞

謝歷日表

課新歷於清臺頒成書於下國緬惟孤賤亦被寵休恭

惟皇帝陛下動必法天政先稽古體春秋之五始用以宅中演洪範之九疇推而建極臣幸備守藩之列得聞告朔之期敦勸農桑苟民無失時之歎不忘夙夜庶臣為報國之方

賀今上皇帝表

佑下民而作之君寶歷幸逢於傳舜有大德者得其壽緡儀復覩於尊堯自古所無幸今而見恭惟以乾之健重離之明述作之勤未嘗敢怠溫清之問每退愈勤惟

皇心自佚於宴閒故睿算倍膺於悠久載崇寶冊已新
唐室之成規親奉玉卮更舉漢家之故事成命一布歡
聲四來臣幸生盛時得覩熙事緬瞻天闕講九賓具列
之儀謹與臣工歌萬壽無疆之頌

賀太上皇后牋

天休滋畀睿算增隆凡屬覆臨舉同歡抃恭惟躬履慈
儉性資懿恭夏以塗山共輔勤勞之業文惟太姒同膺
壽考之休稽簡籍以未聞聲中外而同慶臣以在外不

獲趨詣闕廷稱賀

賀太上皇帝尊號表

御圖三紀龐恩固結於方維冠德百王鴻號聿崇於典冊事瞻前而鮮儷裕垂後以無窮神人叶謀華夏胥慶恭惟太上皇帝陛下憲天覆育體道沖虛性靜而仁自存誠著而德彌卽皇文煥而與堯克配聖武昭而惟湯有慙顧衆善之兼該宜徽稱之備舉刻之琬琰而不朽參之典謨而益彰天子有尊用極養親之孝羣臣歸美

庶伸報上之勤屬明時綽禮之成致下國歡心之馮臣
濫膺郡綬阻邁朝班欲盡形容日月每難於繪畫第深
贊頌山川願等於久長

賀太上皇后牋

禮嚴寶冊尊上徽稱益昭母道之崇庸表坤承之助涓
辰叶吉率土交欣恭惟太上皇后殿下居順以履中躬
儉而節用上齊明德下廣慈仁延福祿以綿綿宜子孫
而蟄蟄臣幸逢華旦忽覩盛儀入賀兩宮雖莫陪於舞

臨仰祈萬壽第自極於歡呼

賀皇帝表

養莫大於尊親方上玉卮之壽名必歸於有德載揚寶冊之儀喜溢兩宮慶均萬國恭惟太上皇帝體乾之健振炎祚於復興太上皇后以坤之柔佐洪休於有永凡屬照臨之下悉蒙覆庇之功恭惟皇帝陛下道本傳心孝能繼志謹一日三朝之禮未盡答揚竭九州四海之供曷殫敬愛惟縟典之備欲光於前後故徽章之上宜

至於再三誕布堯言仰知舜慕凡百王之未有誠千載之罕逢臣職在淮邦神馳天闕逖聞盛事拜莫廁於鵷行第與斯民懽有同於爵躍

賀太上皇帝表

縟典告成乃千載罕逢之會慈闈篤慶實萬世無疆之休凡與見聞惟增舞蹈恭惟太上皇帝陛下配天其澤與物為春曰希曰夷玩意無為之境惟精惟一傳心有道之君謂世世修德莫若於文王故巍巍成功難名於

堯帝已涓吉旦誕受徽稱事掩前聞裕垂後裔臣濫膺
郡寄邈在淮堧呼傳漢嶽之三莫陪近列福贊箕疇之
五第竭微誠

賀太上皇后牋

穀旦既差縉典備舉表九重之孝治動萬國之歡心恭
惟太上皇后殿下象體坤承德侔天作緯衣助祭昔嚴
裸獻之容玉冊揚休茲盡推尊之義實養親之為至誠
曠古之所無臣幸值昌辰逖聞盛事鬱哉佳氣瑞已驗

於書雲介以壽祺明永瞻於儼日

賀今上皇帝表

誕膺駿命不忘付託之公尊上鴻名庶盡答揚之義禮
已涓辰而告備事誠曠古以無鄰聖德何加民心胥悅
恭惟皇帝陛下善繼其志允執厥中億萬斯年續綿綿
於周歷五十而慕體業業於舜心謂承顏順色未極於
養親故崇德廣業乃彰於致孝載揚徽號屬在明時臣
遙企天光欣聞帝詔稱觴上壽固莫測於嵩呼稽首揚

休實願同於虎拜

蠹齋鉛刀編卷十五

欽定四庫全書

靈齋鉛刀編卷十六

宋 周孚 撰

表牋

賀太上皇帝尊號表

酌皇祖之令章徇聖子之誠請爰差穀旦誕正鴻名凡
在覆臨惟均鼓舞竊以尊親者孝之極致得名者聖之
所難考漢未央之朝尚多闕禮視唐興慶之冊未極徽
稱猶且載在信書以為盛事舉此一新之典自我重明

之時恭惟受命穆清宅心昭曠仁出於性小湯武而不
為德積以誠與天地而相契宸章煥於奎壁皇威肅乎
風霆集列聖之大成適千齡之嘉運茂膺寶冊以介壽
祺方謳歌朝覲之歸蓋嘗薦舜摠神聖武文之運用以
尊堯惟事宏業鉅而難以名故詞複言重而盡其美自
今創見于古尠聞臣去國年多瞻天意切與五帝而六
幸親逢於盛時稱萬壽者三恨莫陪於此日

賀皇帝表

爰歷靈辰載崇徽冊尊親之義曲盡愛敬之心兩全恭
惟太上皇帝躬神聖之資而宅中太上皇后推儉慈之
化而輔內雖不可名言如天地之運而凡所臨照如日
月之明既壽而康式燕且喜恭惟以下武之聖繼重離
之明繼志述事之勤未嘗少懈視膳問安之敬不以自
勞輯百王未定之儀彰千載莫逢之慶惟發舒盛德號
難襲於尋常故啟悟皇心請特勤於一再尊稱既正孝
治愈隆臣身處塞垣心存天闕廁奉常之列愧常効於

謏材拜上閣之章恨莫陪於盛禮

賀太上皇后牋

日時協古典寶告成孝治發於內朝懽心浹於寰海恭
惟侔尊宸極媲德坤元並大明而御天擴至慈而育物
大禹建夏自塗山而肇基太姒于周得武王而為子爰
對膺於徽冊用仰答於洪休彤管生輝紫籙增耀溥天
率土共仰嚴君之尊億載萬年躬受聖子之養臣以在
外不獲趨詣闕廷稱賀

賀太上皇帝表

孝治增隆正虞舜養親之日帝齡默畀協唐堯異位之
期載籍莫聞神人同慶恭惟凝神物表探賾環中齋心
服形躬履黃帝之訓深根固柢不忘老耄之言惟恬淡
寂寞而德以全不吹噓呼吸而壽自至福有同於箕翼
算行倍於松喬付大器於笑談已光于古縱宸心於閒
燕其始自今欣忭所同形容莫既臣幸生盛世得覩殊
休載驅載馳方愧皇華之選如山如阜第歌天保之詩

賀太上皇后表

涓選令辰肇稱嘉禮徽音既嗣惟頌交騰竊自載籍以
來歷數宮闈之盛雖能肅齊嬪御以正六寢之儀未有
奉承舅姑親饗一獻之禮集茲盛事允屬昌時恭惟義
重繼承恩深燕翼眷惟聖嗣有肅雖無射之勤相以元
妃盡儆戒相成之道誕敷明詔光正徽稱日邇月以為
明陰與陽而分治臣幸生昭代得覩殊休喜溢兩宮復
見葛覃之化慶流萬世載歌瓜瓞之詩

賀皇帝表

涓吉日於泰筮崇徽稱於長秋慶自中闈歡均外服臣
聞親迎于渭開周受命之祥釐降于媽助舜奉親之孝
惟今載見於古有光恭惟體德圓穹匹休聖父躬問安
視膳之敬不敢怠違推求賢審官之心尚資儆戒採淑
德於彤管正常尊于紫籙日月增明天地奠位臣濫持
符節阻造闕廷捧萬年之觴雖莫陪於下列上百男之
頌竊願效於謏材

賀南郊表

升煙泰壇肆青象魏協氣蟠於穹壤歡聲徧於邇遐臣
聞非天子不考文惟聖人能饗帝代堯主祭舜德感於
百神推稷配天周命隆於二后兼茲盛美屬在熙朝恭
惟齊聖廣淵剛健純粹振墜典於千載之後追遐蹤於
三代之前年穀屢豐兵革不試祇承聖父之訓仰答皇
天之休薦明德於衆盛尊至和於笙磬烈祖並侑羣靈
畢從省牲眎滌之辰積陰頓革奠璧獻箏之際祥光四

臨備熙事於一朝均湛恩於萬寓胞閭咸喜囹圄一空
非曲盡於宸心曷默來於靈眈臣魂馳帝闕身繫塞垣
當宣室之受釐莫陪清問為元和而作頌第切丹悰

代趙漕謝轉副使表

忽奉中俞備聞外計人共駭其非據臣亦慙於罔功臣
猥以謏材濫膺煩使一持使節三易歲華以其承命之
勤委以揅荒之政凡捐除租賦使無追呼之擾與振發
倉廩以消流亡之憂皆聖訓之所裁顧臣勞之安有方

自陳於疲苴庶少竊於安閒成命再加初心有愧況臣
孤根難植小器易殫自顧缺然無左右游談之助其惟
致此盡聖神特達之知恩大難酬感深以泣恭惟堯仁
宅下舜智察倫謂著在三尺之文莫非寬大故差擇百
城之寄要在廉平不謂迂儒亦玷華選臣敢不祇承德
意遵奉詔條期在富民敢較米鹽之細謹於律下誓懷
冰蘖之清

會慶節表

皇天育聖肇開長發之祥良月應辰式記誕彌之候自
南自北以舞以歌恭惟欽明文思剛健純粹別白賢否
則帝堯之哲覆冒夷夏則文王之仁式休命於九圍接
大統於千歲惟克明其德既與日以俱新則於萬斯年
宜配天而罔極茂膺百福以錫庶民臣職綴內朝身居
外服雖心存天闕不忘子牟之忠而躬奉帝觴更切倪
寬之意

謝賜歷日表

欽崇天道器爰正於璣衡敬授人時書乃頒於正朔凡
叨寵錫舉極欣榮恭惟皇帝陛下凝命宅中奉元養物
法傳堯歷析因夷隲之得宜紀叙禹疇歲月日時之無
忒推聖心之所在重民事以惟先臣濫領郡符獲承帝
詔農桑是飭願登豐稔之年財力有餘共樂舒長之日

代趙漕除總領謝表

出將使指專一道之轉輸入備省曹職六師之饋餉狂
於徼幸竊自兢慚竊以楚潤之軍為令勁旅江浙之地

自古富州惟漕輓之計至繁故總督之權亦重粵從近
歲皆出宸衷必須通明詳練之才始稱獎擢甄陞之意
如臣之慙於世少倫坐閱歲時空有伐檀之愧顧瞻儕
輩獨無橫草之功當明命之載臨駭誤恩之無自此蓋
伏遇至明普照大度兼容舜率下而以仁湯用人而惟
已謂宿兵于外今惟兩淮之多而將漕于東臣實四年
之久意其更事可以責成臣敢不酌斂散之宜嚴督程
之法均通貨食軍所需而悉供鉤考簿書吏有姦而必

去庶盡疲篤之力少酬覆燾之私

代解寺丞新到任謝表

負江介淮茲為名郡續長補短以付下臣拜命自天寄
慚無地伏念臣少飄流於異域晚值遇於聖時特憐孤
忠錫以宸翰粵從常調推與中銓方差擇以佐州旋超
遷而領郡迨辭丹陛留官中都一叨大農之除復歷四
年之久偶緣人乏俾綰宜春之章又以食貧令易建安
之組當隆恩厚施之疊至顧綿力薄材而自羞視事之

初撫躬增愧茲益伏遇舜仁博施湯德懋昭知臣艱難
顛沛之時粗能守節察臣踈遠羈孤之迹初不因人錄
其葵藿之誠責以涓埃之效臣敢不恪遵令甲祇服訓
辭夙夜惟勤上體焦勞之意毫釐不擾下安疲瘵之民

靈齋鉛刀編卷十六

欽定四庫全書

蠹齋鉛刀編卷十七

宋 周孚 撰

書

上陳侍郎書

孚不佞誦閣下之詩文願見者十有五年矣曩閣下奉使諸郡也孚以居家艱而不克見迨閣下自典客而歸也孚以拘法禁而不敢見中心蓋嘗快也以謂世有若人焉不能一拜履舄誠非學者之願然尚有可諉者曰

地遠而不能致於前爾今也再過吾里而吾適有所齟齬焉則信吾命之窮也夫窮於一世何害吾欲與古人相角遂今有如古人者而不得見則吾行何所矜式言何所折衷俛俛然何以追配於古人哉此某所以竊自悲其窮也懷之久矣今閣下來開藩於此而某適為民於此盖向之悲今之幸也閣下之位尊矣攀援者衆矣位尊則譽諛之言厭於耳攀援者衆則請求之煩厭於心而某木訥於言固非能諛者以貧為常又不敢輒有

求於人嘗自以為出於二累之外是以敢肆言焉某幼而讀書自知於時事闊疎以功業富貴非我所能致輒欲自託於文章而學之十年所趨愈上而所得愈鈍蓋嘗取左丘明莊周太史遷之書而學文矣而其文終無汪洋自適之態取屈原蘇李建安諸子之詩而學詩矣而其詩終無渾厚不雕鐫之妙以為所學者非則古之人蓋有以是成者矣以為所學者是則某之卑汙蹇淺者獨何歟二者交戰於中而不能釋閣下今學者之和

扁也必有砭石焉儻肯為某一舉手乎謹取舊所著詩賦雜文六十篇合為一編以獻幸閣下一觀之不知卑薄之質尚可息黥補劓以希古人之萬一耶抑亦終碌碌而已耶語有之讀書三十年不如一詣習主簿此某今日之志也惟閣下察之

上虞相書

辛卯

七月十七日左迪功郎周孚謹齋沐裁書再拜獻于僕射相公鈞座天下之士言利害於相公之前者日不知

其幾人雖甚迂而不可行相公亦未嘗斥絕之也相公
雍容於廟堂之上而智者陳其謀勇者獻其決能者出
其伎何其用力少而收功多也某迹雖疎外其託於陶
鈞之內亦久矣不敢匿情而思效其愚非有他說也相
公方博採天下之言以見於政士亦方馳騫於言以求
售乎不佞於是事偶有見焉是以願私告於相公求以
決擇之惟相公寬其罪而使畢其說幸甚幸甚夫天下
之事不難知也而天下之言為難察也世之事衆矣吾

不敢臆度而自用也必使夫能言者言之而後為吾用
焉此常理也然人之情貧而欲富賤而欲貴凡紛運於
吾前者皆有求於我者也有求於我則其言必思有以
悅我矣故常俟吾之熾而為之辭吾苟樂其甘而不核
其實則施之於事其能有成乎故曰知事非難而察言
為難今相公之秉政再替矣天下之策士來言於相公
者不一其事體最大而言之不輟者強敵之未平也當
明天子宵旰於上相公夙夜經度於下而議者能言之

亦可尚矣而某竊疑焉夫天下之人固不可以不信而億之然亦不可不先覺其情也天子與相公之欲成是功也切故彼亦乘吾欲進其說何則進退抑揚之途在是人孰不樂富貴而惡貧賤亦何肯以難售之語而自取棄置也哉是以喋喋之辭日有聞也且今之視敵當如越之視吳范蠡之在越越王屢召而與之謀蠡終不輕告之也蠡非不忠者而遲回如此蓋勁敵之所在謀未成而覺與舉而不中俱為後憂此蠡之所以為難而

今議者易之是人人皆過於蠱也且所謂知兵者古亦罕矣而今之世人人能之是可信乎夫招徠中原之民要結外夷之援示欲戰以使之畏縱反間以令其疑議者之言不過此數端耳賈生有言聽言之道必以其事觀之則言者莫敢妄言曩張丞相之當國急於平天下之難而欲求速成之功當時之嗜利者亦嘗以此借口矣張公不察而興符離之師迨王師至符離言者所陳未嘗有一驗也夫以是藥攻是病既不效矣而復進之

此庸醫之所羞而今議者之所尚也且自為是言亦踰
歲矣其效猶前日也苟窮之則曰王師未嘗興也師興
則應者至矣是復以符離之役要我也劉裕之平燕平
秦其功亦所自成顧其兵力如何耳初不聞以是數者
為先務也凡此恐非其誠也恐所謂求悅我者也萬一
不察其肺肝而陰受之日復一日徒為議者富貴資耳
國家何賴焉相公何賴焉以相公之英姿絕識豈不知
此特曰吾將以是來天下之言耳夫人之品不同故其

趨向亦異且古之為國者類皆淵深沈鷖之士成之而浮躁輕肆之徒敗之是二人者不並立也彼進則此退矣某竊恐相公本樂聞天下之善而徒有紛紛者溷視聽也天子以宗社之重付相公天下以平治之功望相公相公之志亦何嘗一日不在中原也夫事患無其志爾志既定則功將何逃伏惟相公深考秦誓之戒而却暴虎馮河之言以來淵深沈鷖之士不肆不惰以伺驕淫之敵質之於古斷之於心夫豈無隙之可乘而焉用

是曉曉者哉詩曰有淮者淵萑葦淠淠區區之懃惟相
公容之不宣

上梁參政

辛卯

某聞漢人之諺曰孰為為之孰令聽之天下之言豈復
有悲於此者乎夫士當窮阨摧折之時力學自修不敢
少墮其意非苟然也而偃偃一世卒無所遇至於鬢毛
頽白而甘老於山林豈其意哉揚雄號為不汲汲於富
貴者其著書也曰吾以待後世子雲耳疑其不求世之

知也而其論王陽貢禹則曰明星皓皓華藻之力歟觀
雄此言蓋亦自傷其無能聽之者故自分於碌碌而不
悔也士而至此可不為之大哀乎今某之不肖何敢自
附於雄而讀書為文亦久矣方其應進士舉也擯於有
司與以家艱而不得與者凡二十年朋舊交弔之某以
為士之學非止為利祿計也今雖窮不可自棄故取古
之書自六經而下悉觀之而於楚人之騷太史遷之史
唐韓杜氏之詩文尤切學之私心蓋嘗髣髴其一二而

朋舊見之者始弔其不幸而終笑其迂也且天下之人
方以襃積故實為學駢儷對偶為工彫繪其辭支離其
義而已之所好獨與之違則阡死於溝壑亦宜矣而某
亦不暇恤也丙戌之春相公知貢舉擢於稠人之中使
與一命之寵向之笑者為之驚夫學不適時而得科第
人之驚也固宜而某亦恐其名與實違而為知己者之
累也取向所切好之書精思而熟讀之迨今六年矣夫
性之拙者其用心必專而又自去士而吏其窮愈甚是

以愈欲自託於斯文故凡愀然而悲釋然而喜愾然而
欲泣者皆見於此其心自以為于古有毫忽之合而世
之笑者愈衆蓋愛奇者以為拙尚新者以為陳而樂放
縱者以為齷齪也屈馬韓杜不在世吾將於誰質是非
哉此某所以雖鄙棄於人而不之懟也雖然猶有懼焉
蓋未嘗自致於相公之前也古語有之兔走歸窟鳥反
其鄉向日散骸之文前輩所謂聲律記問破壞其體者
相公既已辱收之矣今之所作雖未敢以為是而比之

前日則心頗無甚愧相公其忍逆棄之乎謹取詩賦雜
文合四十九篇以獻機務之暇幸一觀之且某之心力
殫矣而窮亦甚矣苟於此而不之遇焉則某終身將無
望矣昔人有賦褰裳之詩以餞人者其人曰吾在此敢
勤子至於他人乎是亦區區之願也不宣

靈齋鉛刀編卷十七

欽定四庫全書

蠹齋鉛刀編卷十八

宋 周孚 撰

書

答史千伯強書

己丑

辱書加之以甚重之名責之以所不能為之事伏讀再
四惕然以慚向僕見子於稠人中其饑寒困苦既與吾
類即之語而所學所守適有相契者故妄意求交於子
不曰吾有道德文章可以為子之師也子何所見而為

今言乎吾意子言之失也始僕之讀書蓋未嘗與世相聞其用心僻其信古篤迨今辛苦而得之者皆時輩之所笑也而獨甘心焉子乃欲創相投拭以夸於人子何恃而為此子路使門人為臣子曰吾誰欺欺天乎子何以異此從子之言則世必有以僭議吾而妄命子者矣吾為此懼雖然方吾見子也以為與我同類者今而力拒子之言則似少戾夫僕非拒子之相琢磨也不欲子之以此名相號召也攻苦而食淡窮則無所愬言則無

與應俵俵然困於世凡吾之學此其效也子苟能相從於是而無怨焉則吾將分坐而處子矣何必師之云乎子其思之不宣

與彭郝二學正書

孚再拜昨日辱寵臨委諭諄複誠愛我厚知感知感鄙性執愚與人不疑曲非但今日也不知能見諒否古人有言人心不同其如面焉世之人孰不樂富貴而惡貧賤而孚之性則樂貧賤而畏富貴者也芑藿之食甘於

五鼎繻接之衣煖於文繡徒步而徜徉以為安車駟馬之不如也自得一第十有二年而始書一考中間欲應所謂詞學科者習之歲餘忽自笑曰吾應是欲何求哉乃舍去吾子觀之僕豈汲汲於宦達者自到此所行所言吾子亦熟知矣餐錢稍贏得百畝田以歸老此語不但對吾子言之也凡相識者皆知之此僕之志也至於薦舉一事非徒不出諸口亦且不萌諸心然與人同居一州既為吾之長不敢慢也不敢諛也要以如禮而止

則吾之道畢矣吾亦何所冀於人哉然平常知我稍深
待我稍敬苟以是來則姑受之以不逆其意安有平日
以衆人遇我而一旦號於人曰此吾知己吾將誰欺乎
如曰既為是官則當受是舉是薦舉之法以官而不以
才也是豈設法之意乎僕才既在人後矣乃於此冒昧
而受之是無恥也讀古人之書而為苟賤無恥之事縱
僕不自愧奈友朋何且既非知我者是必憐我而與之
也憐而與之是黔敖之食也餓者之所不受而子為我

願之乎凡此幸吾子思之昔夫子於季孫而不食於少
施氏而飽曰少施氏食我以禮此先君子之所行也僕
何敢忘焉吾子行將仕矣亦不可不熟講之目疾未愈
草草上狀殊不盡所懷幸照答不宣

代人上監司書

人有身處於塵坭之中而心希乎雲霄之上者世皆笑
其狂而學之者雖槁死而不悔也問之則曰吾何憂焉
安期羨門之屬皆在世哀吾志而授之道則吾願獲矣

夫其難也如是而世又且笑之然學其道者未嘗輒自
棄也然則天下之事其可以一難而遽止乎伏惟明公
才大而德宏視明而聽聰以天子之命按刺一道凡八
州之吏惣千百焉莫不奔走乎後塵而俯伏於前列是
亦縉紳者之安期羨門也夫槁項黃馘老於窮山惟古
之所謂仙者不哀之爾使其少動心焉則決不汨汨逐
逐而天且亡也此某所以有今日之請也明公之馭吏
也可謂寬矣而某適得隸麾下明公之待下也可謂有

禮矣而某嘗得承顧眄之末是其幸也天所賦也明公
歲得上其屬於審官而某困於選調亦久矣不識明公
其將舍之乎抑亦為之動心也明公方蒐獮英豪而進
之朝而某輒有干焉不謂之妄則謂之僭然某之肺肝
明公固已察之雖其材不足以備採擇而其朴誠之操
兢兢而不敢犯法者敢自必也譬之安期羨門之於人
也豈必待如己者而後授之道哉苟以其志之堅而有
動於吾心則足矣今日之事升之而青雲焉抑之而汙

渠馬嬾一毛於泰山高寸木於岑樓在明公一言之間
耳和扁之側病者呻吟豈惟病之劇而然蓋亦有所望
焉爾詩曰未見君子憂心忡忡既見君子我心則降區
區之意惟明公矜而憐之

小簡

寄周日新

十月十一日得來書正月十四日扶病作報
後三日而取回書者不至以前報未悉又病

少愈因再作此紙

某自相別以病絕不作詩所寄上韓子師詩大意似矣而工夫未甚至此病亦只是讀古人書未造要耳切勿信言詩者說活法夫前輩所謂活法蓋讀書博用功深不自知其所以然而然故活法當自悟中入悟自工夫中入而令人乃作一等不工無味之辭而曰吾詩無艱澁氣此活法也苟如此則三百六篇并離騷可焚去矣此非可造次后山蓋云學詩如學仙時至骨自換第勿

忽遽優而游之饜而飫之久則至矣近年人倒以詩為
容易故卒不造古人藩域老兄蓋學詩二十年矣三折
肱知為良醫故此奉報他日有使人幸寄示近作詩一
二首當續錄拙句相報也

寄解伯時

江津語離勞長者遠出訖令皇愧人至領手教欣審別
來台候萬福乎初八日交割連三日有會十一日方詣
交代許立者且留過是日發遣耳范三哥歸聞嘗相見

不知渠何日過江辛幼安書中云云亦願有向來所傳
所幸者有頗不相悅者沮之耳辛戒小人以且痛忍臧
否不知是可忍乎吐之則逆人茹之則逆余以為寧逆
人也故卒吐之此東坡平生得力處也豈可以一官而
改耶一笑乎三兩日間事稍定當別拜書次不宣

又

日新來問面江之陽自有出處已檢與渠看君要議論
文字莫須更讀些書否他事可用術致此事恐不容機

械可得也發一笑耳緣肺氣與痔疾並作極無善況未
面切冀保重不宣

靈齋鉛刀編卷十八

欽定四庫全書

蠹齋鉛刀編卷十九

宋 周孚 撰

啓

謝虞丞相啓

擢從兄散之職畀以師儒之官衆為嗟驚自慙微幸伏
念某受才骭骸百無一堪觸事屯邅十幾九躓昨叨一
命之寵已踰五年之期惟窮邊之劇繁不容尸祿而文
吏之齷齪或至辭難屬新例之舉行自故官而汰去方

其襍被之際幾有向隅之悲雖窮當益堅自甘踽踽之
謂然老其將至不勝皇皇之心豈謂高明見錄微小賦
以斗升之祿俾與簪裳之游固使盛時復有綿蠻之歎
更憐薄伎得盡侏儒之能況某少多病而今益衰壯嗜
學而晚彌甚常憂尉曹之責忍非書生之宜精神疲於
徼巡術業荒於奔走惟今所授實自本心俸入厚而足
以活妻孥符檄亡而可以閱文字率爾而得恍然以驚
茲蓋伏遇大有以容明而無殺才之鉅細各收其用人

之邪正洞察於中謂朽株猶足為薪而老馬尚能識道
故推大惠以及小夫仰懷濡手之勞愧無以報惟有銘
心之感誓不敢忘

代辛滁州謝免上供錢啓

比陳危懇方竊戰兢仰荷至慈特加閔可民免追呼之
苦吏逃稽緩之愆戴德無窮感恩有自伏念某偶以一
介得領偏州較之兩淮實為下郡地僻且險民瘠而貧
兵革薦更慨莫如其近歲舟車罕至歎有甚於昔時忽

於瘡痍之餘督以承平之賦符檄相仍而至官吏莫知
所為雖載在有司當謹出納之數然驗之近制尚有蠲
免之文云不斂民實為罔上不避再三之瀆庶期萬一
之從逮被湛恩實逾始望某官仁不間遠明可燭微伊
尹佐君恥一夫之不獲周公在內期四國之是皇故令
窮陋之區亦在憐憫之數向愁與歎今舞且歌某恪承
德意遵奉詔條仰惟鈞石之平不遺小物敢有毫釐之
擾以速大尤

代運使賀同知沈樞密啓

伏審光奉綸言晉參樞筦處百萬宿兵之地已賴籌邊
同二三執政之臣益資彊本明良胥會夷夏竦聞恭惟
某官學踐聖藩材優國棟貫穿百氏為時儒者之宗精
白一心勵古王臣之節自茂膺於注委即入贊於幾微
姦黨革心正人增氣眷惟右蜀實控西陲整我六師方
倚名公之翰駕彼四牡式遙山甫之歸旋疏丹陛之恩
再畀青羶之舊惟天下之望所屬故聖主之眷愈隆兵

柄有歸國勢增重謨明帷幄非如晦莫能籌之忠結冕
旒見夷吾可無憂矣夙夜仰陪於基命精神坐抑於遐
衝即觀鍾鼎之勒功共慶台衡之正位某自憐孤迹嘗
望末光誰知簪履之微復處鑪錘之末一枝所托幸安
鷦鷯之栖大廈既成敢忘燕雀之賀其為嚮慕罔既敷
陳

代漕與同知王樞密啓

恭審光膺明制峻貳元樞仁賢彙升華夏均慶某官受

天間氣為世德人柱石之材足以持危任重著龜之智
足以燭微察幽以一代之元勲膺兩宮之隆眷當上聖
撫重熙之運而明公為同德之臣入贊本兵亦已踰歲
凡折衝尊俎以制四夷之服與垂紳廊廟以佐萬機之
平所言無毫釐之差其效如日月之見追茲進拜蓋將
責成雖卒是伐功有資借箸之畫然質諸輿論可後告
廷之除佇從斗極之司端正台衡之任某自惟疵賤久
賴陶鎔趨進未諧悵方違於此日攀援有自喜獨倍於

他人寸心所懷尺牘難盡

代賀葉留守啓

伏自頃者易鎮南荆抗旌西蜀相望百舍緬惟跋涉之
勞欲致一書少効寒暄之問適以筋骸之疲退安閭里
之居既乏使令莫附置郵雖攀援之意未始少變而弛
曠之罪其何以逃非大德之普容豈細故之可略茲承
使節歸尹別都新命一聞孤悰增忭恭惟某官以伊皋
之業值唐虞之時智略足以燭微器識足以任重出臨

方面靡容毫髮之姦入佐經常不益錙銖之賦爰總戎
於武部旋承命於樞廷睿眷彌隆輿情攸係唯此保釐
之任實為柄用之階以理而推數日可待路車乘馬少
淹南土之居衮衣繡裳遄俟東都之逆自惟管蒯當侍
門牆極困扶危韜瑕匿垢不敢忘提耳之誨何以報淪
肌之恩茲以卑身復托大府雖循牆以省昔虞三虎之
疑然引袖自憐今有二天之覆佇待熒煌之坐少陳危
苦之辭

與交代啓

唱第彤廷已叨下列備員外學復玷後塵飾陋質以續
貂竊虛名於附驥靜惟幸會曷易名言某官地望高華
天才敏邵文兼政駿之富經有韋平之明分教于茲閱
時已久雖鄧公雅志不卑博士之官而賈生妙齡宜在
大夫之位佇拜褒嘉之命即躋清峻之班豈惟校祕籍
於鴻都蓋將明典綸於黃闥某幸逃汰斥得奉終更仰
觀高標已慰傾瞻之素敬循餘獲更逃曠敗之虞感愧

之誠敷宣罔既

與趙漕啓

偶緣末第竊薄祿于膠庠幸以鄙身託餘庠于旌棨惟
大府材能之會而台閤德望之隆乃令寒陋之資輒冒
師儒之寵傾依惟舊瞻覲有期恭惟明允篤誠靖共正
直文雖華而濟之以質學既富而處之若無入典郎曹
詳練之材已著出臨輔郡循良之譽復聞當獨冠於鵷
行尚少淹於龍節取與以道民不告勞剗裁有方吏皆

知畏顧星軺夙駕已殫四牡之勤而公袞遽歸佇正三
台之任重惟庸妄特荷知憐既紹介之不先仍光儀之
未覲固已竊聞於道路盖嘗辱問其姓名今者猥以畫
墁之心來効執鞭之役惟明且恕少弛銜轡之威雖賤
而愚終冀憐矜之賜

壺齋鉛刀編卷十九

欽定四庫全書

集部

蠹齋鉛刀編卷

二十至二十六

詳校官庶吉士臣吳烜

主事臣呂雲棟覆勘

總校官進士臣繆琪

校對官中書臣李斯咏

謄錄監生臣劉清澗

欽定四庫全書

蠹齋鉛刀編卷二十

宋 周孚 撰

啟

謝趙漕舉狀啟

投閒置散衆所鄙夷噓枯吹生獨加論薦心自知其微
幸人亦為之歎驚竊以拘而不通世士謂之樸學鄙而
可厭古者以為陳人是皆譏嘲謗罵之由終非富貴利
達之具苟不先於伏匿將自速於譴訶惟某之愚以此

為戒既二累之所萃雖百窮而是甘坐閱兩暮自揣無能之質未嘗一字妄干不韙之誅區區簿書之間蹢蹢流輩之後顧食浮而自愧將歲滿而引歸蓋毀瓦畫墁方切悲於此日豈乞漿得酒敢輒望於他人不謂誤知特形公舉獎拔出於非望褒稱過其所宜辭避靡容兢慙愈劇此蓋伏遇某官持心寬裕秉德靖共以識拔後輩之公任作新多士之寄雖知憚於冒昧不忍使之棄捐斷自高懷以收孤跡然某稟資甚薄得數復竒強以

散材來與衣冠之列嘗期莫景決為農圃之歸雖此際
以被恩終何階而報德其為感忤未易名言

與運幹啓

飄零異縣第深向德之勤邂逅同僚幸有趨風之便方
承庇賴但切欣愉恭惟某官才高一時學貫百代蘊儒
珍於席上操履惟純條婉畫於幕中聲猷甚著方皇家
蒐獮遺材之際正賢者騰踏要津之時不待終更即膺
峻擢丹鳳紫泥之詔金馬石渠之班衆所共期言非為

佞某來從農圃濫玷官班惟玉在山雖餘輝之可借與
驥同皂顧鄙心之甚慙傾依之誠敷述難盡

與向漕啓

伏審芝封疏寵玉節生輝以一代之偉人任兩淮之重
寄凡居庥庇舉切懽愉共惟某官地望高華天姿超卓
蘊淵源之學故能致遠以鉤深負通敏之才足以撥繁
而治劇以儒術而飾吏事仗節義而結主知比奉隆恩
出臨劇郡欺誕之風頓絕嚴明之譽藹聞奏最獨先酬

功可後已試撫摩之政載昇澄清之權惟茲邊方實今
重地非蕭何轉漕何以成漢家萬世之功非劉晏幹旋
何以復唐室兩京之舊僉言允協聖意有歸事業迴出
於古人功名當驗於今日剴裁以道俾屬郡以妥妥彈
壓有方雖疆鄰而懾伏第恐未溫於坐席已聞促召於
鋒車某職忝冷官分甘寒谷自憐兩歲閱蠹簡以徒勞
誰料一朝登龍門而有便其為忻快未易敷陳

代向漕與龔參政啓

疏恩祕殿均秩輔藩凡屬私人舉興善頌共惟某官柱
石任重著龜察微陳善閉邪有孟軻氏之敬獻可替否
得晏平仲之和出逢千載之辰存被兩宮之眷講明國
是排斥官邪積年之弊既除太平之功可俟而力輸誠
請願解繁機委大投艱雖上心之未已辭隆辟寵奈公
意之莫回忍桑蔭之未移即鋒車之促召某偶從泥滓
得在鈞陶薄冰深淵方有戰兢之懼震風凌雨尚賴帡
幪之餘炎歆在辰旌榮就道願謹茵馮之節以為邦國

之休

代賀王參政啟

光膺綸綍之恩進貳鈞衡之政凡居庇覆舉切忻愉恭
惟某官博大閎深高明諒直辭章圭璧配光燄於六經
氣節氷霜鎮澆浮於百吏輟自北扉之直峻執中樞之
權四夷革心六師增氣才無施而不可位每進而益隆
爰被聖知晉參國論貳公弘化雖方奉於冊書經體贊
元尚猶虛於揆席佇聞爰立以副具瞻某久辱誤知忻

聞新命托身鑪錘之末雖自昔年馳魂墻屏之間更憐
今日暑雨方霽薰風載涼更乞相六氣以節宣慰四方
之願望

與新知府解寺丞啓

光奉絲綸榮分符竹平時浙右旣風采之想聞此日淮
堧復雲天之幸仰先聲所暨興頌翕同某官造識高明
負才宏博機藏不測旣能應變而出奇刃發有餘亦可
撥煩而治劇仕塗峻歷主知亦深爰從內朝之班式畀

侯藩之組曾未踰歲復加眷恩矧惟儀真舊號名郡江山明秀風物夥繁倘非遴選之才莫稱撫摩之寄試望之於馮翊聖主之意有歸召黃霸於潁川故府之典尚在第恐不容於視篆佇觀別拜於封泥某潦倒陳人飄流冷族素知甘分既一飽以奚求所賴依仁苟三餘而自樂其為嚮詠莫罄敷陳

代賀沈樞密啟

光膺明制進領中樞凡有識知舉懷忻抃竊惟大臣進

退之義實自聖心選擇之公粵自初元以至今日當其可用則九遷之賞不疑迨其固功則三宅之罰隨至自非歲既久而誠益著安有身雖遠而眷愈隆允惟元臣專此盛美恭惟某官德業之懋配古皋夔威名之聞實今方名撫南荆之巨鎮總西蜀之全師愛威並施姦獠咸革偉革金厄方嚴入覲之儀袞衣繡裳旋正本兵之任雖部分諸將在今則重而師保萬姓非公孰宜忍未半於修途已入司於中鉉某一違鈞著兩易歲華望瑞

節於天涯屢形夢寐俟歸艤於江渚幸拜光塵惟丹慊之所懷非短牋之可旣

答諸生啓

退藏十載嗟壯心之已灰出效一官悵懸顏之如甲自憐晚境得奉英游惟積年向往之勤與此日過從之幸方布叙之未暇忽音問之見貽誠意勤渠鄙懷震疊詩書執禮幼雖學而老則昏直諒多聞昔所志而今始見晤言伊邇向德朁勤

靈齋鉛刀編卷二十